

PLENUM SAVEZA GIG-a SRBIH

20.12.1967.godine održan je prošireni sastanak predsjedništva Saveza GIG-a SRBIH sa predstavnicima podružnica, Geodetske uprave, Geodetskog zavoda, te predstavnicima Više i Srednje geodetske škole.

Dnevni red sastanka:

1. Izvještaj predsjednika podružnica
2. Izvještaj komisije za organizaciju geodetske službe u komuni.
3. Izvještaj komisije za pripreme i organizaciju kongresa GIG-a Jugoslavije
4. Finansijski plan Saveza GIG-a SRBIH za 1968.godinu
5. Razno (privatna praksa u struci, Glasnik, finansijska pomoć za pripreme oko održavanja kongresa).

Po svim pitanjima iz dnevnog reda govorilo se dosta, a o nekim važnijim i interesantnijim biće govora i na slijedećim stranicama Glasnika.

ORGANIZACIJA GEODETSKE SLUŽBE U OPĆINI

Na Plenumu Saveza geodetskih inženjera i geometara SRBIH, koji je održan 20.decembra 1967.godine medju ostalim tačkama dnevnog reda bila je i jedna o organizaciji geodetske službe u općini.

Naime, Predsjedništvo Saveza je na svom sastanku od 21.5.1967.godine imenovalo jedan odbor, koji je imao zadatak da prouči ovo pitanje i da nakon toga podnese Savezu izvještaj, što je i učinjeno na spomenutom plenumu.

Iz podnesenog izvještaja vidi se da je u pogledu organizacije geodetske službe po općinama u našoj Republici veliko šarenilo-samih naziva ima preko dvadeset. U većem broju općina ova služba nije postavljena kao poseban organ kako propisuje čl.14. Osnovnog zakona o premjeru i katastru zemljišta. Dobar broj općina oformio je ovu službu iako zato nema objektivnih uslova (osoblje, instrumentarij, smještaj i dr.), umjesto da su oformili zajedničke službe sa susjednim općinama. Još i danas ima općina kod kojih ova služba nema nijedne računске mašine. U preko dvadeset pet općina na čelu ove službe stoje geodetski stručnjaci koji još nisu položili stručni ispit.

Sasvim je razumljivo da sa ovakvim stanjem (nesredjeno organizaciono stanje, slab kadar i nedovoljan instrumentarij kod jednog broja općina) ova služba ne može uspješno obavljati svoje zadatke. Posebno danas, kada ona po novim saveznim propisima (Osnovni zakon o premjeru i katastru zemljišta, Uredba o premjeru i katastru zemljišta) dobiva nove zadatke (snimanje i održavanje podzemnih instalacija, prikupljanje podataka za održavanje državne karte i dr.).

Odbor koji je pripremio ovaj izvještaj slao je jednu grupu svojih članova u SR Sloveniju i Hrvatsku s ciljem da se upozna sa njihovim iskustvima u vezi organizacije geodetske službe.

Na temelju toga Odbor je i dao prijedlog da se i u našoj Republici pristupi organizaciji ove službe slično kao što je skoro počelo u SR Hrvatskoj:

- da se služba organizuje kao samostalan organ, koji vrši poslove od interesa za općinu;
- da ova služba obavlja sve manje geodetske poslove na teritoriji općine odnosno općina;
- da služba ima svoju potpunu unutrašnju samostalnost.

Istodobno je istaknuto da bi kao prvo trebalo objediniti ove

službe za dvije ili više općina svugdje gdje god one nisu u stanju da djeluju samostalno i gdje nemaju osnovnih uslova za normalan i uspješan rad.

U diskusiji je bilo raznih prijedloga, ali se na koncu Plenum složio, da je ovo vrlo važno pitanje u našoj struci i da njegovom riješavanju treba prići odmah i to sa svom ozbiljnošću.

Zaključeno je da se u zajednici sa Republičkom geodetskom upravom sredinom februara organizuje savjetovanje sa rukovodionicima geodetske službe po općinama i sekretarima skupština općina po ovim pitanjima. Međutim, što se tiče grada Sarajeva, odlučeno je da Predsjedništvo Saveza odmah stupi u vezu sa Gradskim vijećem, te da se pristupi razmatranju i riješavanju ovih problema, jer je situacija u gradu Sarajevu specifična zbog toga što je to gradsko područje sa više općina i što će ovaj grad u skoroj budućnosti dobiti nove planove i novi katastarski operat, a ovakva organizacija, kakva je sada, ne bi mogla uspješno održavati premjer i katastar nakon novog premjera.

Mile Glavaš